

Lingua altai

Na Galipedia, a Wikipedia en galego.

O **altai** (**Алтай тили** *Altay tili*) é unha lingua^[1] da ponla siberiana do sur do grupo nordeste^[2] da familia turca que se fala na República de Altai (Rusia), onde é lingua oficial xunto co ruso, alí os altais constitúen o 31% da poboación. Tamén se fala no krai de Altai. O altai divídese en dous dialectos, o do norte e o do sur, que son inintelixibles entre si e que algúns estudosos consideran linguas diferentes. No censo ruso de 2002 declararon falar altai 65 534 persoas.^[3]Ata 1948 a lingua coñecía-se como **Oriot**.^[4]

Índice

Dialectos

Escrita e usos sociais


Notas

Véxase tamén

Ligazóns externas

Dialectos

- Altai do norte^[5]:
 - Quu ou chalkan, fálao o pobo chalkan que vive nas ribeiras do río Lebed, nas aldeas de Kurmach-Baigol, Suranash, Turachak, Bika, Itkuch e Kebezen^[6], segundo o censo de 2002 son un total de 855 persoas, con 539 falantes.
 - Qumanda, fálao o pobo qumandi que vive na ribeira do río Biya, nos distritos de Soltonski e Krasnogorski do krai de Altai, no distrito de Turochanski da República de Altai e no oblast de Kemerovo^[7], segundo o censo ruso de 2002 son 3114 pero só 1044 falan a lingua propia.
 - Tuba, fálanos os tubalar nas ribeiras dos ríos Katun e Biya e nos seus afluentes, nos distritos de Choiski e Turochakski da República de Altai, segundo o censo de 2002 constitúen un grupo de 1565 persoas con 436 falantes.
- Altai do sur, 20.000 falantes en 1993, divídese nos seguintes subdialectos:
 - Altai, fálase nos distritos de Maiminski, Shebalinski, Ulaganski e Ust-Kanski

	Altai <div><i>Altay tili</i></div>
Outros nomes:	Алтай тили
Falado en:	<u>Rusia</u>
Rexións:	<u>República de Altai</u> (Altai meridional), <u>Krai de Altai</u> (Altai setentrional)
Total de falantes:	57.000 (2010)
Familia:	<u>Linguas turcas</u> <div><u>Linguas turcas siberianas</u><div>Oghuz oriental<div>Altai</div></div></div>
Escrita:	<u>Cirílico</u>
	Estatuto oficial
Lingua oficial de:	 <u>República de Altai</u>
	Códigos de lingua
ISO 639-1:	--
ISO 639-2:	alt
ISO 639-3:	ambos: <div>atv (http://www.sil.org/iso639-3/documentation.asp?id=atv) — <u>Altai setentrional</u></div> <div>alt (http://www.sil.org/iso639-3/documentation.asp?id=alt) — <u>Altai meridional</u></div>

- Telengit, fálase nos distritos de Kosh-Agachski e Ulaganski
- Teleut, fálase nos distritos de Shebalinski e Maiminsky e no krai de Altai

Escrita e usos sociais

O altai comezou a escribirse a partir da década de 1840^[8], cando misioneiros ortodoxos rusos crearon un estándar con base no teleut e adaptaron o alfabeto cirílico. Nesta escrita realizáronse obras de divulgación relixiosa e as primeiras obras literarias altai e tamén a primeira gramática do altai publicada en 1869 pola Misión ortodoxa de Altai ^[9]. Vasily Radlov, o fundador da turcoloxía, viviu entre os altaís entre 1859 e 1871 e recolleu un abondoso material lingüístico e etnográfico.

As autoridades soviéticas crearon unha nova lingua literaria en 1922 baseada no dialecto altai^[10] e reformaron o alfabeto cirílico altai con caracteres procedentes do ruso, pero a diferenza doutras linguas en Siberia foron lingüistas altai e non académicos soviéticos os que fixaron a lingua literaria^[11]. En 1928 editouse a primeira gramática descritiva. Entre 1931 e 1938 o altai escribiuse nunha variedade do alfabeto latino. En 1938 volveuse ao alfabeto cirílico, nunha versión lixeiramente reformada en relación ao anterior. En 1941 publicouse o primeiro dicionario ortográfico do altai. A partir de 1990 houbo unha revitalización da lingua altai. En 1993 promulgouse a Lei de linguas da República de Altai, que declara ao altai e o ruso linguas nacionais da república. Hai programas de televisión e radio en altai: 10 horas semanais na radio e 7 na televisión. O goberno de Altai mantén dúas publicacións bilingües nacionais *Altaidin Cholmon* e *Zvezda Altaia* e 8 rexionais, tamén bilingües e hai dúas revistas infantís: *Soloni* e *El-Altai*. Nas comunidades altai o ensino é en altai, agás as materias que están consideradas de importancia federal que son en ruso, no curso 1992-1993 eran 66 escolas nas que o altai era a lingua primaria de instrución e 77 onde se ensinaba como materia ^[10], no curso 1999-2000 mantiñase o número de escolas en lingua altai, aumentando ata 108 as escolas con altai como materia pero o número de escolares pasou de 4795 a 3346 ^[12] Na Universidade de Gorno-Altai pódese estudar a lingua e existe unha Comisión de Terminoloxía apoiada polo goberno da República de Altai.

Notas

1. O Ethnologue considera que o altai son dúas linguas
2. Lars Johanson e Éva Ágnes Csató, *The Turkish Languages*. Routledge, 1978, pp. 81-125
3. Coñecemento de linguas diferentes ao ruso (en ruso) (http://www.perepis2002.ru/ct/doc/TOM_04_04.xls).
4. Lars Johanson e Éva Ágnes Csató, *ob. cit.*, páxina 403.
5. A maioría dos falantes de altai do norte aparecen nos censos como altai e non como membros dos seus respectivos pobos segundo o Atlas de linguas en perigo da UNESCO
6. Maja Čeremisina *Yaziki Korennikh Narodov Sibiri: Chalkanski sbornik*, Instituto de Filoloxía da Academia Rusa de Ciencias, 2005, páxina 44
7. Endageraded Languages of Indigenous Peoples of Siberia (<http://lingsib.iea.ras.ru/en/language/s/kumandy.shtml>) e Christopher Moseley *Encyclopedia of the World's Endangered Languages*. Routledge, 2007, páxina 262
8. Lenore A. Grenoble *Language Policy in the Soviet Union*. Springer, 2003, páxina 184
9. Lauri Harvilahti e Z. S. Kazagacheva *The Holy Mountain: Studies on Upper Altay Oral Poetry*. Suomalainen Tiedekatemia, 2003, páxina 19
10. Lenore A. Grenoble, *ob. cit.* páxina 185
11. Bokarev e Desheriev (eds.) *Mladopismennye iazyki narodov SSSR*, 1959, páxina 146
12. Kutlay Yagmur e Sjaak Kroon *Objective and Subjective Data on Altai and Kazakh Ethnolinguistic Vitality in the Russian Federation Republic of Altai Journal of Multilingual and Multicultural Development*, Volume 27, Número 3, maio de 2006 , páxinas 241 - 258

Véxase tamén

Ligazóns externas

- Altai do norte no Ethnologue (http://www.ethnologue.com/show_language.asp?code=ATV)
- Altai do sur no Ethnologue (http://www.ethnologue.com/show_language.asp?code=ALT)



Vexa a proba da Wikipedia en **Altai meridional** (<https://incubator.wikimedia.org/wiki/Wp/alt>)



Vexa a proba da Wikipedia en **Altai setentrional** (<https://incubator.wikimedia.org/wiki/Wp/atv>)

Traído desde "https://gl.wikipedia.org/w/index.php?title=Lingua_altai&oldid=5453821"

A última edición desta páxina foi o 9 de maio de 2020 ás 22:38.

Todo o texto está dispoñible baixo a licenza Creative Commons recoñecemento compartir igual 3.0; pódense aplicar termos adicionais. Consulte os termos de uso para obter máis información.

Wikipedia® é unha marca rexistrada da Wikimedia Foundation, Inc., unha organización sen fins lucrativos.